



₹ 5/

# तुबारि

www.pangi.in

अब अंग्रेजी, हिन्दी त  
पंगवाड़ी भाषा अन्तर असी।

Issue 81; 15/12/2018

## बिषय सूची

टाई अजीब बोकी के	1
मेघे	2
त किस	2
धन्य मेहणु	3
मेहणु के फर्ज	3
तोउं कोठिया एन्ति ई?	4
लखे टके बोके	4

## खास दन

22 दिसंबर रेजी त श्रीरि के चेझगि असी, तुसी सोबी हैं पांगेई इस नउए तिहारे बंधे। तुस सोब इस तिहार कियां बाद सोबी तिहारी के मोज निए। राख धिक कम पिए जेसे बेलि कि तुस अपु त अपु टब्बरे खुश हेरी सकते।

## धाणि त तसे जुएली

केआं अब सते बंटी अठ फेरे लवाण चाहिए। सत फेरे तेन्के व्याहे, आठुं जे फेरा असा, से कुई जे लवाण चाहिए कि से कुई बचांते त तेस




## टाई अजीब बोकी के गजब चमत्कार

यक राजा थिया से सुसुर न्याए कताथ। से प्रजाई हर सुखे-दुखे चिन्ता अपु टबरे ई कताथ। पर केहि दिनि केआं खडि तसे अन्तर घमण्ड ई एण लगो थिआ, त तसे मन अपु कम करण अन्तर लगण लगो न थिआ। तेन घमण्ड न करणे सुआ कोशिश की, पर से कमयाव न भुआ।

यक रोज राजा जपल राजगुरु केई गा त राजगुरु राजे मुहँ हेर कइ तसे मने परिशानी बीझ गा। राजगुरु बोलु, 'राजन, अगर तुस में टाई बोके हर टेम याद रखिएल त जिन्दगी अन्तर कदी बि ना-उम्मीद ना भुन्ते। 'पेहली बोक, रात पक्के किले अन्तर बिशुण। दोकी बोक, अब्बल त स्वाददार रोटी खाण, होर टेकी बोक हमेशा नरम बछाण पुठ उंघुणा।' राजगुरु अजीब बोके शुण कइ राजे बोलु, 'गुरु जी, ई कर कइ त में मन अन्तर होर बि सुआ घमण्ड भोई घेण असा।' तोउं राजगुरु मुस्कराई कइ बोलु, 'तुसी में बोकी मतलब न समझे। अउं तुसी समझांता।'

पेहली बोक हमेशा अपु गुरु जोई साते बिश कइ इज्जतदार बण बिशुण। कदी बि बुरी आदत अपु मन अन्तर न रखीण। दोकी बोक, कदी बि अब्बल या भरी पेठ रोटी न खाण। जीं बि मिलिएल खुश भोई कइ त परेम जोई खाण। ई कर कइ रोटी खाल त अब्बल त स्वाददार लगती। होर टेकी बोक, घट केआं घट उंघुणा। हमेशा खड खड बिश कइ अपु प्रजाई रक्षा त देख-भाल करीण। जपल उंघ एण लगीएल त राजसी बछाणे ख्याल छड दी कइ भीं या जेठि बि जगा मेईयेल तेठि उंघ घेण। ई करणे बेलिए तुसी लगतु कि तुस नरम बछाण पुठ असे। कोईआ, अगर तुस राजे जगाई सेवक बण कइ, देख-भाल करणेबाड़ा बण कइ या देणेबाड़ा बण कइ अपु प्रजाई ख्याल रखियाल, त कदी बि घमण्ड, धन, राजपाठ त कोई मोह तोउ छुइ न सकता।' घमण्ड मठे-मठे बुद्धि नष्ट कइ छता। राजे बि घमण्ड भुण लगो थिआ।

एस अन्तर त राजे अपु गुरु केआं सलहा नी कइ अपु परीशानी हल कीढ छडा, पर अगर तुस बि ई परीशानी अन्तर असे त झठ अपु मन अन्तरा रावण रुपे घमण्ड भीं कीढ कइ प्रभु रुपी नउए जाप करे जिन्दगी खुशहाल भोइ घेन्ति, ताकि तुस हमेशा हर घड़ी खुश रहेल।




तुबारि पत्रिके अन्तर छपो सोबी लेख, त कथा अन्तर भुओ विचार सिर्फ लेखके भो। तुबारि पत्रिके एसे कोई जिम्मेबारी नेई। तुबारि पत्रिका सिर्फ भाषा सुहलियत करण जे यक मंच देण लगो असी।



## मेघे

सुआ रोजे भाइण केआं बाद यक रोज मेघे लगी।  
 ईए एलुच जे हक दिती त एलुच खेड़ी  
 “खड़ी भो! दौड़ी खड़ी भो, दौड़ी कती खरी बोक असी मेघे लगो सी”  
 एलुचे मुँहु बि ना धु, तेन खोपुड़ बि ना ले, सद खुरी जोई बुटे ले  
 से सुआ खुश त सुआ बेधरीए बि थी।  
 जेखेई से बहेरी गई त बहेरी बत अली त खा खुदे भोई गो थी।  
 जे तेन ही ब्यादी बत बठ लुखो थी से मेशी गओ थी।  
 अभेई बि बत बठ मेघे लगो थी। ई लगण लगो थी कि  
 जीं कोई बत बठ मेठुण मेठुण मेहणु नचण लगो थिए।  
 बत सुआ मेहणु थिए त से हला करण लगो थिए।  
 एलुचे अपफु जोई बोक की  
 “मोउं सुसुर हांटुण चाहिए जीं सीएणि पेकि जिल्हेणु हेंटती  
 बिलकुल तिहांणी!”




एलुचे छतरोड़ बठ मेघे लगण लगो त  
 तेसे बेलि यक अब्बल धुन नसण लगो  
 तेन तीं धुन पेहला कपले नेओथ शुणो  
 टप टप टप टप टप  
 टप टप टप टप टप  
 तिएस दन भई मेघे ना रुकी, पुरे दन भई छिटयां लगा  
 एलुच अगल बेणी सेकुल कियां बि अमरे कना जे हेरी बिशो थी।  
 जेखेई एलुच तेसे बोउ सेकुल कियां नेण जे आ  
 त तेन अपु छतरोड़ ना बिसी  
 से सेकुल अपु बुटे, सरकाप बिसी घेंतिथ  
 पर तेन अपु छतरोड़ ना बिसी, बत सुआ मेहणु हला करुं लगो थिए  
 तोउं एलुचे मन सोचु कि त एपफ जे बोलण लगो  
 “मोउं सुसुर हांटुण चाहिए जीं सीएणि पेकि जिल्हेणु हेंटती  
 बिलकुल तिहांणी!”  
 तेसे बेलि यक अब्बल धुन नसण लगो  
 तेन ती धुन पेहला कपले ना शुणी  
 ए घीत एलुचे गी पुजण तकर लगतु री।  
 एलुच अब मोटि कुई भोई गो थी, से तेन्हि बोकी पुरी बिसी गो थी  
 तेस बोकी अब तेस कोई चेता नेओथ  
 तेस याद भोल ना भोल से तीएस तेसे पहला रोज थिया  
 जिएस तेन छतरोड़ी चलाण शुचो थी  
 तेस कियां बी खास त से रोज थिया  
 से जिएस एलुच बजन ईए बोउए सेकुल घेण लगो  
 त तेठिया बापस गी एण लगी।

## त किस

इस सुआल थिया यक मेठुण कुई,  
 कोई 10, 12 साले कुई  
 से यक लमे किड़े पतोती दौड़ण लगो  
 थी। अउं तेसे पता दौड़ी  
 तेसे पुछीड़ टाई कइ तेस पतुं जे जोर  
 देण लगी त हुशेरी दी कइ “सरला ना  
 कर।”

“किस ना करुं?” तेन पुछु  
 “ए कोई लुघो या लुणु ना भो ए नाग  
 भो” मेई जबाव दता  
 मोउं नाग किस ना टाण  
 किस टाण असा  
 तोउं अस किड़ी खांते, पता असा ना?  
 सरले बोलु म्युकुड़ कटते  
 छोड़ बेचते, मांसु खांते  
 अछा इस फेरी ना कर मेई बोलु  
 अउं कती, अउं कती  
 से टाई कइ तेसे ईया कें नी दे  
 जेठी से कम कतीथ  
 तेसे ई टोप बुणण लगो थी  
 तेसे ईए तेस जे बोलु  
 “आईए, मैं पुलो पहाड़ उंघी दे”  
 “किस”?



“किस तु थेकि नेई गो ना?” मेई पुछु  
 सरलाई जोरी जोई मगर हिला “ना”।

# धन्य मेहणु

कतु धन्य असा से मेहणु जे दुष्टी के सलाह पुठ ना हंठता,  
 होर ना पापी मेहणु जुएई बत खड़ीता त ना बुराई करणेबाड़ी जुएई किठींता!  
 पर से त परमेश्वरे नियम मानण अन्तर खुश रेहंता,  
 त दन रात भगवाने वचन पुठ ध्यान कता रेहंता।  
 से तेस बुटे ई भुन्ता, जे पोणि चश्मे ओत बसो असा  
 त सुसुर टेम पुठ अपु फल फलता,  
 होर तसे पन्ने कदि ना शुकते।  
 तोउं त, जे कुछ बि से मेहणु करियाल, से कामियाब भोई घेन्तु।  
 पर दुष्ट मेहणु ई ना भुन्ते। से तेस केउए ई भुन्ते, जे ब्यारी बेलिए  
 उडरता।  
 एस बझई जुएई दुष्ट मेहणु परमेश्वरे सामाड़ी टिग ना सकते,  
 होर ना पापी धर्मी मेहणु के हुसड़े अन्तर टगते।  
 किस कि परमेश्वर धर्मी मेहणु अपु बत हंटान्ता, पर दुष्ट मेहणु तेन्के बर्वादी अन्तर छइ छता।



## मेहणु के फर्ज

यक फेरी बोक भो भारते महान दार्शनिक गुरु अपु चेली जोई यक फाठ बड़ हंटण लगो थिया। से कुछ दूर हंटण किया बाद यक जगाही रुक गे। गुरु बोलु “कोठि कोउं रोलुण लगो असा।” से तेस रोलुण शुण कइ तेसे कना जे घेण लगे। तेसे चेले बि तेसे पता पता घेण लगे यक जगाहि तेन हेरु कि यक जिल्हाणु रोलण लगो असी।



गुरु तेस केआं तेसे रोलणे बझह पुछी त तेन जिल्हाणु बोलु “इस जगहि थारे में कुआ खा। तेस कियां बाद गुरु तेस जल्हेणु जे बोलु “तु त इठि एकेली असी, तें होरा टब्बरा को? तेन जिल्हेणु तेस जे जबाव दता कि हैं पुरा टब्बरा इसे फाठ बठ बिश्ता। पर कुछ रोज पेहला एनि थारे में राणे ता घेणि खाई छे। अब अउं त में कोईए इठि बिश्तेथ। आज तेन थारे में कुआ बि खाई छा।

ई शुण कइ से गुरु हेरान भोई कइ तेस जिल्हाणु जे बोलुण लगा कि तुस इस खतनाक जगाई छइ किस ना देतें। ई शुण कइ जिल्हाणु तेस जे बोलु, “अस तोउं त नेओथ छऔं किस कि इठि केसे अत्याचेरी के शासन त नेई ना। से थार यक ना

यक रोज त मरणे ई असा।

एस बठ गुरु अपु चेली जे बोलु जेरूरी एस जिल्हेणु बठ असी तरस खाण चाहिए, किस कि एन असी जे सचु सचु बोलो असु। कि यक बुरे शासक राज्य अन्तर बुशुण कियां त खरु असु कि असी, जंगल या रुण बुशुण चाहिए। जद कि मोउं त करुं असु कि पुरे राज्य मेहणु बि ई सोचुण चहाई कि असी सोबी एसे विरोध करण चाहिए। सत्ताधारी सुधारण जे असी सोभी जेई उई-मी कइ तेंके विरोध करण चाहिए।



## तोउं कोठिया एन्ति ई?

यक रोज  
यक गभरुवाल  
जिल्हाणु  
डाक्टराणि केई  
गई। तेस जोई  
तेसे रेणी त तेसे  
धेणी बि गो। से  
हस्ताड़े बहार बुशो  
थिए। अन्तर  
डाक्टराणि केई



घेई कइ से रोलुण लगी त बोलु, 'डाक्टर जी, में गिहे बाड़े में पेठ अन्तरा गभरु लिंग हेरण चहान्ते। जद कि में मन ई करण जे नेई मनण लगे। छने तुस में मदद करे। तुस मोउं इ बत हाराले जेसे बेलि कि में ए समस्या टाली घिएल।"

कुछ टेम बाद तेन डाक्टराणि जे बोलु, "तुस में धाणि त रेणी जे बोले कि अगर तुस एस गभरु लिंग हेरण चहान्ते त अउं एस केस ना नेन्ती। तुस एस सुआण जे होर जगाई घिन घिए।

डाक्टराणि बोलुण लगी "तु किस ना चहान्ति? किस कुआ ना लौता ना तोउ? यक कुई त असी तुसी। त तु किस खतरा नेण लगे असी?" त तेन जिल्हाणु 'खतरा' शब्द शुण कइ हैरान भोई गई त डाक्टराणि जे हेर कइ बोलु,



"मेडम जी, तुस बी ई सोचुण लगियेल त ई कोउं बणती? ई कोठिया एन्ति? त बगैर ई भुमण कीं चलता?"

## तुबारी मासिक पत्रिका

- ◆ अस इ उम्मिद करं लगे असे कि एणे बाड़े रोज अन्तर सुआ मेहणु इस कम अन्तर साथोट देन्ते।
- ◆ इस तुबारी मासिक पत्रिका समाचार पत्र एकट अन्तर रिजिट्रि नेई भो। सिर्फ पांगी घाटि अन्तर पढुं जे त भाषाई सुहलियत करण जे इ पत्रिका शुरु किओ असी।
- ◆ तुबारी यक अवाणिज्यिक पत्रिका भो।
- ◆ तुबारी पत्रिका कोई मेहणु, जनजाति, त संस्कृति गलती कढेण जे नेई छपाण लगे। अगर कोई ई सोचता बि त अस जिम्मेबार नेई।
- ◆ छपाणे पेहे सोभ आर्टिकल दुई टाई पांगेई मेहणु हाराले असे। इ त खुली बोक असी कि पेहलि बार पांगवाडि लिखणे सुआ मुशकिल भुन्ति त गलती बि भुन्ति। अगर कोई लिखणे गलती असी त असी जे जरूर बोले। त अस तसे होरे संस्करण पुठ ठीक करणे कोशिश कते।
- ◆ आर्टिकल्स ना मिलेल, या घाटि मेहणु के साथोट ना मिलेल त तुबारी पत्रिका कदी बि बंद भुई सकती।
- ◆ कोई चीज छपां असी या नेई छपां जे तुबारी संपादकीय टीम पुरा अधिकार असा।
- ◆ अस किलाड केन्द्रीय पुस्तकालय, त बजार हरिराम लाले दुकान अन्तर तुबारी ड्रॉप बॉक्स पुठ बि अपुं सझाव ओर आर्टिकल्स रखुं जे सुविधा किओ असी।
- ◆ अस सोबी पांगी मेहणु जे हात जोड़ कइ अनुरोध कते कि, तुस बि कोई अछा आर्टिकल, पुराणि या नोई कथा, कहावत, कविता, त नोई घीत (पागवाड़ी अन्तर) लिख कइ छपां जे हेहे दिए।

### तुबारी संपादकीय टीम

- ☎ 9418429574
- ☎ 9418329200
- ☎ 9418411199
- ☎ 9418904168
- ☎ 9459828290



## लखे टके बोके



- अकलदार कुआ हेर कइ बोट खुश भुन्ता, पर मुख कोईए बड़ाई जुएई ई उदास रहेन्ती।
- दुष्ट त पापी मेहणु के रखो धने बेलिए लाभ ना भुन्ता, पर धर्म बड़ाई जुएई मरण केईया बच घेन्ते।
- धर्मी मेहणु परमेश्वर कदी दुके मरण ना देन्ता, पर दुष्ट त पापी मेहणु के इच्छा बि पूरी भुण ना देन्ता।
- जे कम करण हेर सुसत भोई घेन्ता, से गरीब भोई घेन्ता, पर कमेर मेहणु अपु हथेरी बेलिए अमीर बण घेन्ता।
- जे कुआ बरशाड बेहड़ता से अकलदरी जुएई कम करणेबाड़ा भो। पर जे कुआ लुणणे टेम नस-भास उंघ बिश्ता से बेइज्जती बड़ाह बणता।
- धर्मी मेहणु पुठ सुआ अशुश भुन्ति, पर पापी त दुष्ट मेहणु के मुँह नियोकइ छता।